

10 MAY 1996

Razaleigh-Penyatuan

JAWATANKUASA KHAS PENYATUAN S46 DENGAN UMNO DIPERSETUJUI

KUALA LUMPUR, 10 Mei (Bernama) -- Tengku Razaleigh Hamzah hari ini berkata Parti Melayu Semangat 46 (S46) akan menjalin hubungan dan kerjasama sebagai rakan dengan parti yang memerintah bagi membuka laluan ke arah penyatuan parti itu dengan UMNO.

Sebagai langkah pertama, Presiden S46 itu serta para pemimpin tertinggi parti itu akan menghadiri konvensyen Umno sempena sambutan ulang tahun ke-50 Umno di Pusat Dagangan Dunia Putra (PWTC) di sini esok.

Pada persidangan berita di kediamannya di Jalan Langgak Golf di sini, Tengku Razaleigh berkata pembentukan sebuah jawatankuasa khas bersama antara Umno dan S46 telah dipersetujui untuk meningkatkan kerjasama itu demi perpaduan Melayu.

"Sesungguhnya, saya akui penyatuan parti kami dengan Umno merupakan satu formula terbaik ke arah penyatuan Melayu. Sehingga kini Parti Melayu Semangat 46 belum dibubarkan," katanya.

Timbalan Presiden S46 Datuk Rais Yatim, Setiausaha Agung Datuk Abdul Manan Osman dan Ketua Penerangan Ahmad Shabery Chik adalah antara para pemimpin S46 yang hadir pada persidangan berita itu.

"Saya ingin tegaskan, demi perpaduan Melayu dan kesejahteraan rakyat keseluruhannya dalam melangkah abad ke-21, kami akan memberi kerjasama dan membantu kepimpinan Datuk Seri Dr Mahathir Mohamad sebagai Perdana Menteri Malaysia," katanya.

Ditanya mengenai bentuk kerjasama itu, Tengku Razaleigh berkata S46 akan menyokong tindakan Kerajaan Persekutuan dan kerajaan-kerajaan negeri pimpinan Barisan Nasional (BN).

Ahmad Shabery pula berkata sebagai tanda sokongan itu, S46 tidak akan bertanding dalam pilihan raya kecil kerusi Dewan Undangan Negeri Bukit Asahan, Melaka pada 3 Jun. S46 tewas kepada BN dalam pilihan raya lepas di kawasan itu.

Tengku Razaleigh telah dua kali bertemu dengan Dr Mahathir dalam masa enam minggu lepas bagi membincangkan usaha ke arah perpaduan Melayu termasuk kemungkinan beliau dan seluruh anggota S46 menyertai Umno.

Beliau mengulangi kenyataannya bahawa jika semua anggota Semangat 46 bersetuju menyertai Umno, mereka akan berbuat demikian secara beramai-ramai.

Beliau berkata prinsip perjuangan parti itu tidak lagi akan dijadikan senjata untuk berkonfrantasi tetapi sebaliknya untuk memberi sumbangan kepada "rakan-rakan dalam kerajaan yang memerintah".

Pilihan bagi orang Melayu, katanya bukan lagi antara parti-parti Melayu yang bertarung atau mana-mana peribadi yang menerajui.

"Sebaliknya pilihan mereka ialah antara kemajuan dan kemunduran. Antara perdamaian dan persengketaan. Antara kewarasan dan dorongan emosi," katanya.

Ketika ditanya sama ada bentuk kerjasama dengan Umno itu akan termasuk kemungkinan S46 duduk bersama dengan Umno sebagai pembangkang dalam dewan undangan negeri Kelantan, beliau berkata:

"Kalau nak timbulkan soal di Kelantan, kita masih memegang jawatan dalam Exco kerajaan negeri Kelantan. Jadi kita masih berada dalam kerajaan," katanya.

Ketika ditanya sama ada jawatan-jawatan Exco itu akan dikembalikan, beliau berkata; "Setahu kita, kita belum ditendang lagi". -- BERNAMA

AZZ AH NMO

